

¿Puede pidise la paz en Gaza y al tiempu vender armes a Israel?



«España tará al llau d'Israel»; el compromisu del gobiernu español a favor d'Israel, seya la situación que seya, ye «absolutu y total». Les pallabres son de Miguel Ángel Moratinos, ministru socialista d'Asuntos Esteriores, y nun dexen llugar a duldes. Los fechos, tampoco.

El compromisu de Moratinos nun se frañó hasta la fecha. Ente 2007 y el primer semestre de 2008, el gobiernu español vendió armamentu por más de trés millones d'euros a Israel. Nesta factura, ente otru material bélico, hai fusiles, pistoles, ametralladores, silenciadores, cámares y equipos d'infrarroxos emplegaos p'atopar oxetivos nocherniegos.

¿Podemos pidir la paz en Gaza y al tiempu vender armes a Israel? ¿Podemos salir n'Asturies a pidir la paz en Gaza cuando'l gobiernu español esporta armes feches n'Uviéu? Dende la Plataforma Asturies con Palestina creemos que non. Armar a Israel ye ser cómpliz del xenocidiu. Ye facilitalu. Ye participar na masacre.

España, como parte de la estratexa occidental entamada polos Estaos Xuníos y sofitada pola Xunión Europea, ta dando cobertura permanente a les aiciones militares d'Israel. Nesti sen, el gobiernu español tien amosao dafechu la so subordinación a la estratexa estadounidense de llucha escontra'l terrorismu. Dempués de la retirada de les tropes d'Iraq, la colaboración del executivu de Zapatero cola cruzada antiterrorista estadounidense nun dexó de medrar, con una presencia destacata n'Oriente Mediu y Asia. Dende 2004 España tien incrementao la presencia de soldaos

n'Afganistán, involucrándose en misiones béliques. Dende 2006, más de mil soldaos españoles operen nel sur del Líbano, nuna misión protectora del agresor israelí y que tien como enfotu facer más feble y desarmar la llexítima resistencia de Hezbolá. N'Iraq, el gobiernu d'España siguió cola colaboración colos Estaos Xuníos, al traviés de los servicios se-

¿Podemos pidir la paz en Gaza y al tiempu vender armes a Israel? ¿Podemos salir n'Asturies a pidir la paz en Gaza cuando'l gobiernu español esporta armes feches n'Uviéu? Dende la Plataforma Asturies con Palestina creemos que non. Armar a Israel ye ser cómpliz del xenocidiu. Ye facilitalu. Ye participar na masacre.

cretos, de la formación de cuadros militares y policiales del gobiernu colaboracionista iraquí y del consentimientu de los vuelos de la CIA. Pa dexar ensin llendes la presencia cada vuelta más bultable del «exércitu humanitariu» español en delles misiones internacionales –Somalia ye l'últimu episodiu–, el gobiernu ta acabante d'eliminar el llímite de 3.000 soldaos españoles en misiones esteriores.

El xenocidiu israelí del pueblu palestín nun puede garrar a nadie por sorpresa: yá dura más de sesenta años. Poro, afirmar qu'Israel bombardea, asesina, tortura y espulsa a los habitantes de Gaza ensin el consentimientu de los gobiernos occidentales, o ye una inxenudá descomanada o una manipulación pergrande. D'esto último saben muncho los grandes medios de comunicación.

El sofitu del gobiernu español a Israel nun ye namás militar. Nel marcu de la X.E., l'executivu de José Luis Rodríguez Zapatero sofita y caltién un alcuerdu d'asociación ente la X.E. y l'estáu hebréu. Inda más, nel pasáu mes d'avientu la X.E. aprobó qu'esti alcuerdu evolucione p'haza una asociación reforciada.

A pesar de tolo dicho, esta mesma selmana, el presidente español desixó a Israel l'altu al fueu na franxa de Gaza. Nun nomó a Hamás, polo que dalgunos medios de comunicación presentáronlu como un cabezaleru de la causa palestina. Nada más alloñao de la realidá. Tres de les pallabres de Zapatero escuéndense los fechos que retraten la cara verdadera del PSOE: la d'un partíu y un gobiernu hipócrites, que nun tomaron medida dala énte Israel, que caltién intactes les sos rellaciones diplomátiques, económiques y polítiques con un Estáu asesín, al qu'aprovisiona de los aperios afayadizos pa facer una matanza anguaño en Gaza, onde cási que un millar de persones fueron executaes. Los movimientos del ministru Moratinos pa promover un altu al fueu empobínense a sofitar el plan exipciu, respaldáu por Francia. Esti plan, que reedita nel mesmu sen la intervención internacional nel Líbano, tien como oxetivu debilitar y desarmar a la llexítima resistencia palestina, en concreto, a Hamás, a los que'l ministru nuestro nun dexa de responsabilizar de la intervención israelí. Dende que Hamás, puxando pola resistencia a la ocupación, ganare col 65% de los votos

les eleiciones de 2006, entamaes y verificaes por Occidente, Israel convirtió esti territoriu nun guetu, acorripiando a los sos habitantes, faciendo por rendilos por fame y desesperu, privándolos d'agua, comida, lletricidá, combustible, melicines y trabayu. Una situación que cunta col sofitu de los EEXX, X.E., Xapón y Canadá, que sometieron a esti territoriu a un embargu financieru. Esti bloquéu dexó un millón y mediu d'habitantes de Gaza al borde de la fame estrema. La tasa de probeza pasó d'un 29% en 2004 al 81% en 2008.

La violencia, poro, ye la ocupación sionista. Énte asesinatos como los qu'asoceden en Gaza dende'l 26 d'avientu, el discursu doble del gobiernu ye indignu dafechu. Como yá ficiere cuando taben na oposición cola guerra d'Iraq, el PSOE pretende controlar y sacar beneficiu eleutoral de les movilizaciones populares en sofitu al pueblu palestín y escontra Israel, vaciándoles de conteníu y tracamundiándoles nun espectáculu ensin consecuencias. Preba del cinismu del gobiernu ye que'l 13 de xineru, 19 díes dempués del entamu del ataque hebréu a Gaza, la ministra d'asuntos esteriore israelí, aconceyada con Moratinos, espresó-y la so comprensión y la so gayola pola posición del executivu español.

Y precisamente, ye la gravedá d'esta matanza lo que nos desixe dotar de conteníu real les nuestres aiciones. Ye imprescindible seguir cola movilización popular escontra'l xenocidiu israelí en Gaza y escontra la complicidá del gobiernu español, asina como denunciar la hipocresía del PSOE y d'aquelles organizaciones que la respalden. Dende la Plataforma Asturiana con Palestina, desiximos al gobiernu español la ruptura inmediata de les rellaciones económiques y diplomátiques con Israel y la condena firme al crime de guerra sionista en Gaza.

Crime de Guerra en Gaza. Rompamos con Israel

Plataforma Asturias con Palestina